

Službene novine Kantona Sarajevo, broj 44/22

Na osnovu člana 13. Zakona o principima lokalne samouprave u Federaciji Bosne i Hercegovine ("Službene novine Federacije BiH", broj 49/06 i 51/09), a u vezi sa članom 171. stav 3. Zakona o socijalnoj zaštiti, zaštiti civilnih žrtava rata i zaštiti porodice sa djecom ("Službene novine Kantona Sarajevo", broj 38/14 - Prečišćeni tekst, 38/16, 44/17, 28/18, 52/21 i 40/22) i člana 28. i 86. Statuta Općine Ilidža ("Službene novine Kantona Sarajevo" broj 33/10 - prečišćeni tekst, 18/16), Općinsko vijeće na 17. redovnoj sjednici održanoj dana 17.10.2022. godine, donijelo je

ODLUKU

O DODJELU POMOĆI LICIMA U STANJU SOCIJALNE POTREBE SA PODRUČJA OPĆINE ILIDŽA

DIO PRVI - OPĆE ODREDBE

Član 1.

(Predmet odluke)

Ovom Odlukom utvrđuju se uslovi, načini i kriteriji dodjele pomoći (u daljnjem tekstu: pomoći) licima u stanju socijalne potrebe sa područja općine Ilidža (u daljnjem tekstu: Općine).

Član 2.

(Pojam socijalne potrebe)

- 1) Socijalnom potrebom u smislu zakona smatra se trajno ili privremeno stanje u kome se nalazi građanin ili porodica, prouzrokovano ratnim događajima, elementarnim nesrećama, opštom ekonomskom krizom, psihofizičkim stanjem pojedinaca ili drugih razloga koji se ne mogu otkloniti bez pomoći drugih lica.
- 2) Cilj pružanja pomoći na osnovu ove Odluke je približno dostići minimalnu materijalnu sigurnost i nezavisnost pojedinca i porodice u zadovoljavanju osnovnih životnih potreba.

Član 3.

(Lica u stanju socijalne potrebe)

Licima u stanju socijalne potrebe iz člana 2. smatraju se:

- a) Korisnici stalne novčane pomoći, korisnici lične invalidnine, tuđe njege i pomoći putem Službe socijalne zaštite Općine Ilidža - Kantonalnog centra za socijalni rad;
- b) Osobe sa posebnim potrebama kao i osobe nesposobne za samostalan rad;
- c) Korisnici dodatka na djecu;

d) Djeca bez oba roditelja i djeca bez roditeljskog staranja do navršene 18 godine života odnosno do navršениh 25 godina života ukoliko se nalaze na redovnom školovanju;

e) Stara, bolesna i iznemogla lica starosti preko 65 godina;

f) Lica koja se nađu u stanju socijalne potrebe u slučaju smrti užeg člana domaćinstva;

g) Domaćinstva čiji su svi punoljetni članovi na evidenciji nezaposlenih;

h) Porodice čiji se jedan član liječi od teške bolesti a ne ispunjava uslove u dobivanju jednokratne novčane pomoći u participiranju liječenja teško oboljelih osoba.

DIO DRUGI - VRSTE I USLOVI ZA OSTVARIVANJE POMOĆI

Član 4. (Vrsta pomoći)

1) Pomoć se može dodijeliti u vidu novčane i materijalne pomoći.

2) Pravo iz člana 3. da pomoć mogu ostvariti i lica za koje Služba za rad, socijalna pitanja, zdravstvo, izbjeglice i raseljena lica utvrdi da ne spadaju ni u jednu od kategorija navedenih u članu 3. ove Odluke, ali da se ipak uzimajući u obzir cjelokupnu situaciju prikazanu u socijalnoj anamnezi sačinjenoj od strane socijalnog radnika Službe socijalne zaštite nalaze u stanju socijalne potrebe.

3) U istim slučajevima načelnik može u vidu pomoći dodijeliti prehrambene i higijenske pakete licima odnosno domaćinstvima koji se nalaze u stanju socijalne potrebe.

Član 5. (Utvrđivanje sredstava)

1) Sredstva za dodjelu pomoći utvrđuju se u Budžetu Općine za svaku kalendarsku godinu.

2) Na prijedlog Komisije imenovane od strane općinskog načelnika, sredstva utvrđena na ekonomskom KODU 614200 - grant pojedincima za pomoć socijalno ugroženim osobama, raspoređuje općinski načelnik u skladu sa utvrđenim kriterijima.

3) Pravo na pomoć ostvaruje se jednom u toku kalendarske godine, a izuzetno prema procjeni stanja, u socijalno opravdanim i zdravstvenim slučajevima, dva puta u toku jedne kalendarske godine.

Član 6. (Uslovi za ostvarivanje prava)

Uslovi za ostvarivanje prava utvrđeni ovom Odlukom su:

a) da podnosilac zahtjeva ima prebivalište na području Općine Ilidža ili lica koja imaju boravište po osnovu statusa raseljenih lica i izbjeglica;

b) da je podnosilac zahtjeva lice u stanju socijalne potrebe definisano članom 3. ove Odluke.

Član 7. (Lica koja ne mogu ostvariti pravo)

1) Pravo na pomoć ove Odluke ne mogu ostvariti porodice u kojima je jedan od članova zajedničkog domaćinstva vlasnik preduzeća ili samostalne radnje ili ima registrovanu dopunsku djelatnost, osim u izuzetnim slučajevima;

2) Izuzetnim slučajevima iz stava 1. ovog člana smatraju se:

a) vrsta bolesti,

b) težina bolesti,

c) starosna dob,

d) elementarne nepogode,

e) smrti jednog ili više članova porodice.

3) Pravo na pomoć po odredbama ove Odluke ne mogu ostvariti porodice koje su ostvarile pravo na drugi vid jednokratne pomoći iz nadležnosti Službe za rad, socijalna pitanja, zdravstvo, izbjeglice i raseljena lica i Službe za boračka pitanja Općine Ilidža.

DIO TREĆI - NAČIN OSTVARIVANJA I VISINA POMOĆI

Član 8. (Komisija)

1) Zahtjev za ostvarivanje prava na pomoć (u daljnjem tekstu: Zahtjev), podnosi se Službi za rad, socijalna pitanja, zdravstvo, izbjeglice i raseljena lica, koja obavlja administrativne poslove za potrebe Komisije, putem protokola Općine.

2) Komisiju za dodjelu pomoći licima u stanju socijalne potrebe imenuje općinski načelnik iz reda zaposlenih u Općinskom organu uprave.

3) Komisija iz prethodnog stava sastoji se od 3 člana i podnesene zahtjeve razmatra jednom mjesečno.

4) Dokumentacija koju je potrebno priložiti, biti će navedena na zahtjevu, koji će biti dostupan na web stranici i šalter sali Općine Ilidža. Zahtjev za ostvarivanje prava čini sastavni dio ove Odluke i isti se može mijenjati neovisno od odredaba Odluke.

Član 9. (Medicinska dokumentacija)

1) Pod pojmom medicinske dokumentacije koja se podnosi uz zahtjev iz člana 6. stav 2. ove Odluke, o zdravstvenom stanju i radnoj sposobnosti, podrazumijeva se: otpusna lista ili prepis historije bolesti bolnice u kojoj se lice liječilo ili ispitivalo i specijalistički nalazi.

2) Dokumentacija iz stava 1. ovog člana treba da bude jasna i precizna, da sadrži dijagnozu lica te ne smije biti starija od 6 (šest) mjeseci.

Član 10. (Pismo obavještenje)

1) Ukoliko se iz priložene dokumentacije ne može utvrditi da li podnosilac zahtjeva ispunjava uslove iz člana 6. ove Odluke, nadležna služba može po službenoj dužnosti tražiti i dodatnu dokumentaciju.

2) Ukoliko je utvrđeno da nisu ostvareni svi uslovi za ostvarivanje prava na pomoć ovom Odlukom, podnosioc zahtjeva će

biti o istom obaviještem aktom nadležne službe.

Član 11.
(Visina novčane pomoći)

1) Lica u stanju socijalne potrebe mogu ostvariti pravo na pomoć u maksimalnom iznosu od 700,00 KM i to kako slijedi:

- a) Domaćinstva do dva člana u iznosu do 250,00KM;
- b) Domaćinstva do četiri člana u iznosu do 300,00KM;
- c) Domaćinstva preko četiri člana u iznosu do 350,00KM.

2) Iznos pomoći utvrđen stavom (1) ovog člana može biti uvećan do 100%.

3) Novčana pomoć iz stava 1. može biti uvećana utvrđivanjem materijalnog statusa i radne sposobnosti, stepena invalidnosti, vrsti bolesti i gubitka radnog statusa.

Član 12.
(Isplata novčane pomoći)

1) Isplata pomoći licima u stanju socijalne potrebe vršit će se putem Službe za finansije Općine uplatom na tekući račun korisnika usluge.

2) Služba za rad, socijalna pitanja, zdravstvo, izbjeglice i raseljena lica će pratiti dinamiku trošenja budžetskih sredstava za isplatu pomoći te o istom izvještavati općinskog načelnika.

DIO ČETVRTI - ZAVRŠNE ODREDBE

Član 13.
(Prestanak važenja)

Stupanjem na snagu ove Odluke prestaje da važi Odluka o kriterijima za dodjelu novčane pomoći iz Budžeta Općine Ilidža socijalno najugroženijim licima ("Službene novine Kantona Sarajevo", broj 14/04) i Odluka o izmjeni Odluke kriteriju za dodjelu novčane pomoći ("Službene novine Kantona Sarajevo", broj 9/05).

Član 14.
(Stupanje na snagu)

Ova Odluka stupa na snagu osam dana nakon objave u "Službenim novinama Kantona Sarajevo".

Broj 01-02-6703/22-9
17. oktobra 2022. godine
Ilidža

Predsjedavajući
Tarik Stambolić, s. r.